

Isumaginninnermi suliassaqarfimmi nakkutilliisarneq pillugu Namminersorlutik Oqartussat nalunaarutaat nr. 3, 3. april 2019-imeersoq Atuussimasoq (Historisk)

Isumaginnittoqarfiup aqunneqarnera aaqqissuussaanelu pillugit Inatsisartut peqqussutaanni nr. 11, 12. november 2001-imeersumi § 1, imm. 2 kiisalu Meeqqat tapersorneqarnissaannut Inatsisartut inatsisaanni nr. 20, 26. juni 2017-imeersumi § 8, imm. 6, § 11, imm. 5 aamma § 37, imm. 7 malillugit aalajangersarneqarput:

Kapitali 1

Kommunalbestyrelsip ingerlatsineranik pingaarnertut nakkutilliineq

§ 1. Naalackersuisut qitiusumik nakkutilliinermik ingerlatsivia (Nakkutilliinermik ingerlatsivik) kommunalbestyrelsip ingerlatsineranik aamma inunnik isumaginninnermut inatsisinik aqutsineranik, matumani aamma meeqqat tapersorneqarnissaannut Inatsisartut inatsisaannik kiisalu meeqqanut isumaginninnermilu suliassaqarfiup iluanni pisortat ingerlatsineranni suliat suliarineqartarnerat pillugu inatsimmi aamma pisortat ingerlatsinerat pillugu inatsimmi malittarisassanik pingaarnertut nakkutilliisuusaaq.

Imm. 2. Nakkutilliinermi kommunit aqutsinerat aamma kommunit iluanni paaqqinniffiit pineqarput.

§ 2. Pingaarnertut nakkutilliinermi § 1 malillugu uku pineqassapput:

- 1) § 3 malillugu inatsisit,
- 2) § 4 malillugu aningaasaqarneq, aamma
- 3) § 3 malillugu isumaginninnermi suliassat suliarineqarnerisa pitsaassusiat.

Imm. 2. Pingaarnertut nakkutilliinerup imarissavai:

- 1) suliassanik assigiinngiaartunik misissuineq,
- 2) inunnik ilisimaarinnittunik oqaloqateqarnerit, aamma
- 3) ingerlatsiviup aaqqissuussaanelanik misissuineq.

§ 3. Inatsisinik isumaginninnermilu suliassanik nakkutilliinermi, § 2, imm. 1, nr. 1 aamma 3 malillugit naliliiffigineqassapput ingerlatsiviup:

- 1) maleruagassanik allasimasunik periaasiulersimasunillu malinninnera,
- 2) nassuiaasarnera missiliuisarneralu,
- 3) suliamut paasissutissiinera, suliamik suliarinninnera naammagittaalliuutinillu suliaqarnera,
- 4) piginnaasatigut tutsuiginassutsikkullu ajornartorsiutinik suliarineqarnera, aamma
- 5) imminut nakkutilliivigisarnera aamma aqutsinikkut nakkutilliinera.

§ 4. Aningaasaqarnermik nakkutilliineq § 2, imm. 1, nr. 2 malillugu nalilerneqassaaq, kommunip isumaginninnermi suliassaqarfimmi aningaasaqarnermik ingerlatsinera isumannaatsuunersoq,

inatsisinillu tunngavilersorneqarnersoq.

§ 5. Nakkutilliinermik ingerlatsivik § 1 malillugu kommunini ataasiakkaani minnerpaamik ukiumut ataasiarluni pingaarnertut nakkutilliinermik ingerlatsisassaaq.

Imm. 2. Nakkutilliinermik ingerlatsiviup nakkutilliinermiut atatillugu ukiut sisamakkaarlugit kommuninut qinigaaffiup iluani illoqarfiit tamarmiusut nakkutilliartorfigisimassavai.

Imm. 3. Nakkutilliinermik ingerlatsiviup nakkutilliinermiut atatillugu imm. 2-mi piffissap pineqartup iluani nammineq naliliinini malillugu nunaqarfiit assigiinngitsut nakkutilliartorfigisimassavai.

§ 6. Pingaarnertut nakkutilliineq § 1 malillugu sapaatit akunneri 2 sioqqullugit kommunalbestyrelsimut kalerriutigineqassaaq.

Nakkutilliinermiut nalunaarusiaq

§ 7. Nakkutilliinermik ingerlatsivik § 1 malillugu pingaarnertut nakkutilliinermiut tamaasa kingorna nalunaarusiamik suliaqartassaaq.

Imm. 2. Nakkutilliinermiut nalunaarusiaq minnerpaamik §§ 3-mi aamma 4-mi pissutsit tullerriaarneqarsimasut misissuiffigineqarnerannik aamma isummerfigineqarnerannik imaqassaaq.

§ 8. § 7 malillugu nakkutilliinermiut nalunaarusiaq inaarutaasumik suliarineqannginnerani kommunalbestyrelsimullu nassiutinnginnerani nakkutilliinermiut nalunaarusiaq minnerpaamik ulluni 14-ini kommunalbestyrelsimut tusarniaassutigineqassaaq.

Imm. 2. Nakkutilliinermiut nalunaarusiaq kingusinnerpaamik ullormi nakkutilliiffiusimasumit qaammatit 3-t qaangiutinnginneranni naammassillugu suliarineqareersimassaaq.

Imm. 3. Nakkutilliinermiut nalunaarusiaq Naalakkersuisut nittartagaanni tamanut saqqummiunneqassaaq.

Imm. 4. Nakkutilliinermiut inaarutaasumik nalunaarusiaq kommunalbestyrelsimut nassiunneqareernerata kingorna qaammatit 2-t ingerlareerpata, kommunalbestyrelse Nakkutilliinermik ingerlatsivimmut allakkatigut nassuiaammik nassiussissaaq, tassanilu kommunalbestyrelsip nakkutilliinermiut nalunaarusiami pissutsit assuarineqartut qanoq iliuseqarfigalugit aaqquviginierai allassimassapput.

Kapitali 2

Kommunini meeqqanik nalinginnaasumik inummut sammititamik nakkutilliineq

§ 9. Kommunalbestyrelse meeqqat kommunimi atugaannik ingerlaavartumik nakkutilliinissaminut pisussaaffeqarpoq. Meeraq imaluunniit meeqqat eqimattat 18-it inorlugit ukiullit immikkut ikiorserneqarnissaminik pisariaqartitsisinnaasut, kommunalbestyrelsimiut ilisimaneqalernissaat anguniarlugu, kommunalbestyrelse sapinngisamik siusissukkut nakkutiginnittassaaq.

Imm. 2. Kommunalbestyrelse imm. 1 malillugu nakkutilliineq naammassiniarlugu kommunip nunaqarfiinut tamarmiusunut ukiut tamaasa nakkutilliartorluni tikeraartassaaq.

Kapitali 3

Meeqqanik angerlarsimaffiup avataanut inissinneqarsimasunik inummut sammititamik nakkutilliineq

§ 10. Kommunalbestyrelse inissiisoq meeqqap inissinneqarsimasup inissinneqarfiani ukiumut marloriarluni inummut sammititamik nakkutilliisassaaq.

Imm. 2. Meeraq kommunimut allamut inissinneqarsimappat, kommunalbestyrelse inissiisuusoq kommunimilu inissiiffiusumi kommunalbestyrelse isumaqatigiissusiorsinnaapput, kommunalbestyrelse inissiisoq sinnerlugu taanna nakkutilliinermik ingerlatsisassaaq.

Imm. 3. Imm. 2 malillugu nakkutilliinermik ingerlatsinissaq pillugu isumaqatigiissusiortoqarsimappat, kommunalbestyrelsimit inissiisumit suli akisussaaffigineqarpoq, nalunaarummi uani aalajangersakkat malillugit nakkutilliineq ingerlanneqassasoq.

§ 11. § 10 malillugu inummut sammititamik ingerlaavartumik nakkutilliinikkut qulakkeerneqassapput, meeqqamut tunngatillugu iliuusissanut pilersaarutip inissiiviusumi malinneqarnissaa aamma meeqqap pisariaqartitai eqqarsaatigalugit ikiorsiinerup naammattuunissaa siunertamullu naapertuuttuunissaa, taakkununga ilanngullugit:

- 1) meeqqap inissinneqarfigisamini sumiginnarneqannginnissaa imaluunniit innarlerneqannginnissaa,
- 2) meeraq taassumalu angajoqqaavi pisinnaatitaaffimminnik ilisimatinneqarnissaat, aamma
- 3) naammagittaalliuutaasinnaasut, meeqqap akuuffigisaasa inerneru meeqqamut, angajoqqaatut oqartussaasunut kiisalu meeqqap sullissisuanut tunniunneqarnissaat.

Imm. 2. Meeqqat tapersorneqarnissaannut Inatsisartut inatsisaanni § 30, imm. 2, nr. 2 malillugu meeraq ulloq unnuarlu paaqqinniffimmut inissinneqarsimappat, nakkutilliinerup aamma qulakkiissavai:

- 1) iliuusissanut pilersaarummi siunertarineqartoq anguniagaasorlu ulloq unnuarlu paaqqinniffiup katsorsaanissamik pilersaarutaani naammassineqassasut,
- 2) meeqqap inissinneqarsimasup pisariaqartitai ulloq unnuarlu paaqqinniffiup perorsaariaasiatigut ikorfartorneqassasut,
- 3) ulloq unnuarlu paaqqinniffik killiffimmik nalunaarusiornermigut aamma katsorsaanissamik pilersaarumminik nutarterisarnermigut ingerlaavartumik nalunaaruteqartassasoq, aamma
- 4) pissaanermik atuisimanerit malitseqartinneqartassasut pissaanermillu atuisimaneq pillugu nalunaarutit tunngavigalugit meeraq ulloq unnuarlu paaqqinniffimmi eqqortumik ikorfartorneqarnerisooq naliliiffigineqartassasoq.

§ 12. § 10 malillugu inummut sammititamik nakkutilliinermut atatillugu meeraq kommunalbestyrelsimit oqaloqatigineqartassaaq.

Imm. 2. Meeqqamik oqaloqateqarneq inunnit inissiivimmeersunit najuuffigineqanngitsumik ajornanngippat ingerlanneqassaaq, apeqqutaatinnagu meeraq ilaqutariinni paarsisartuni imaluunniit ulloq unnuarlu paaqqinniffimmi inissinneqarsimanersooq.

Imm. 3. Meeraq oqaloqateqarnermini allanit ikiorserneqarnissaminik pisinnaatitaaffeqarpoq. Kommunalbestyrelsip meeraq tamanna pillugu paasitissavaa. Meeraq pisinnaatitaaffeqarpoq nammineq aalajangiisinnaatitaanini malillugu uku ilagisinnaallugit:

- 1) meeqqat illersuisuat isumaginninnermi suliatigut ilisimasalik, imaluunniit

2) inuk alla oqaloqateqarnermi ilagisinnaavaa.

Imm. 4. Imm. 3, nr. 2 malillugu meeraq oqaloqateqarnissamut inummik ilaqarniarpat, meeqqallu mianerineqarnissaanut tamanna naapertuutinnngitsoq nalilerneqarpat, inuk pineqartoq kommunalbestyrelsimit oqarfigineqarsinnaavoq oqaloqateqarnissamut peqataasinnaanngitsoq. Kommunalbestyrelse aalajangiippat inuk pineqartoq oqaloqateqarnissamut peqataasinnaanngitsoq, oqaloqatigiinnissaq aallartitsinnagu meeqqat illersuisuat isumaginninnermik ilisimasalik kommunalbestyrelsimit aggersarneqassaaq. Aalajangiineq meeraq pillugu iliuusissanut pilersaarummi allaganngorlugu kommunalbestyrelsimit tunngavilersorneqassaaq.

Imm. 5. Meeqqap pisinnaaneqassusaa annikillierarsimappat, oqaloqatigineqarnerminilu ikiorneqarnissamik pisariaqartitsippat, tamanna kommunalbestyrelsimit immikkut eqqarsaatigineqassaaq meeqqap isumaata tusarneqarnissaa qulakkeerniarlugu aamma tassunga atatillugu periutsinik aamma ikiorsiissutsinik immikkut ittunik atuisinnaavoq.

Imm. 6. Meeqqamik oqaloqateqarnissaaq immikkut pissuteqarluni pinngitsoortinneqarsinnaavoq, matumani meeqqap inerissimassusaa pissutaappat imaluunniit meeqqap mianerineqarnissaa pissutigalugu oqaloqateqarnissaaq naapertuutinnngippat. Oqaloqateqarnissap pinngitsoortinneqarnera meeraq pillugu iliuusissanut pilersaarummi allaganngorlugu tunngavilersorneqassaaq.

§ 13. § 10 malillugu kommunalbestyrelse inummuk sammititamik nakkutilliinerminut atatillugu piffimmi inissiiffiusumi pissutsinik ernumanartunik maluginiagaqarpat, oqartussaarfimmut ingerlatsinerup tunngasutigut nakkutilliinissamik suliaqarnissaminut akisussaatitaasumut kiisalu kommunalbestyrelsinut inissiisuusimasunut kommunalbestyrelse nalunaaruteqassaaq, meeraq imaluunniit meeqqat piffimmi inissiiffiusumiittut pissutsinik ernumanartunik sunnerneqarsinnaappata.

§ 14. Kommunalbestyrelsip meeraq ingerlaannartumik peersissavaa, meeqqap atugarissaarneranut, peqqissusaanut imaluunniit ineriartorneranut annertuumik innarliisinnaasumik pasitsaassisoqarsimappat uku pissutigalugit:

- 1) meeqqamik amigartumik isumassuineq isumaginninnerluunniit,
- 2) timikkut tarnikkulluunniit persuttaaneq, paarsinerlunneq imaluunniit kinguaassiuutitigut atonerluineq,
- 3) meeqqami imaluunniit meeqqap qanigisaani atonerluinermik ajornartorsiutit, pinerluttutut pissuseqarneq imaluunniit allatigut inuuniarnikkut annertuunik ajornartorsiuteqarneq, imaluunniit
- 4) meeqqap allatigut pissusilersornerani naleqqussarniarneraniluunniit ajornartorsiutit.

Kapitali 4

Ilaqutariinnik paarsisartunik ingerlatsinerup tungaatigut nakkutilliineq

§ 15. Kommunalbestyrelsip ilaqutariinnut paarsisartunut akuersissummik tunniussaqtup ilaqutariit paarsisartut ukiumut ataasiarluni aamma pisariaqartitsineq malillugu ingerlatsinerup tungaatigut nakkutilliiffigisassavai. Nakkutilliinikkut qulakkeerneqassaaq ilaqutariit paarsisartut paarsisuunissamut aamma ilaqutariinnut paarsisartunut akuersissutini tunniunneqartuni piumasaqaatinik suli naammassinissinnaanersut.

Imm. 2. Ilaqutariinnut paarsisartunut akuersissut piumasaqaatitaqtumik tunniunneqarsimappat

piumasaqaatit eqqortinneqarnersut kommunalbestyrelsip nakkutilliinermini misissussavaa.

Imm. 3. Kommunalbestyrelsip ingerlatsinerup tungaatigut nakkutilliinermini ilaqutariinni paarsisartuni pissutsit misissorlugillu ilaqutariit paarsisartut oqaloqatigissavai.

Imm. 4. Kommunalbestyrelsip ingerlatsinerup tungaatigut nakkutilliinermini:

- 1) ilaqutariit paarsisartut nalunaaqqaarluni nakkutilliartorfigisassavai,
- 2) ilaqutariit paarsisartut paasissutissanik piniarfigisassavai, aamma
- 3) meeqqat ilaqutariinni paarsisartuni inissinneqarsimasut paasissutissanik piniarfigisassavai.

Imm. 5. Kommunalbestyrelsip imm. 4, nr. 1 malillugu nalunaaqqaarluni nakkutilliartortarnermi saniatigut ilaqutariit paarsisartut nalunaarfigeqqaarnagit aamma nakkutilliartorfigisinnaavai.

§ 16. § 15 malillugu ingerlatsinerup tungaatigut nakkutilliineq ilaqutariinnik paarsisartunik paarsinermilu suliassamik qanoq ingerlatsisarnermik assigiiaartumik, aaqqissuussaasumik tunngavilersorluakkamillu nalilersuinissamut tunngavissiisumik ingerlanneqassaaq.

Imm. 2. Nakkutilliineq inunnit suliap ataqatigiinnissaanik paasinnissinnaasunit taamalu ilaqutariit paarsisartut unammillernartoqartitaannik ingerlariaqqinnissamullu periarfissaannik nalunaaruteqarsinnaasunit ingerlanneqassaaq.

Imm. 3. Kommunalbestyrelsip nakkutilliinermit atatillugu qulakkiissavaa, siusinnerusukkut nakkutilliinermit nalunaarusiaasimasuni oqaaseqaatit, kaammattuutigisimasat peqqussutillu aaqqissuussaasumik malitseqartinneqartarnissaat.

§ 17. Ilaqutariit paarsisartut kommunalbestyrelsimit § 15 malillugu nakkutilliisuusumit qinnuigineqarunik paasissutissat kommunalbestyrelsip ingerlatsinerup tungaatigut nakkutilliinermini pisariaqartitai tunniutissavaat.

Imm. 2. Ilaqutariit paarsisartut paasissutissanik kommunalbestyrelsimut tunniussisinnaapput ingerlatitseqqinneq pillugu angajoqqaatut oqartussaassuseqartut akuersiteqqaanngikkaluarlugit pisinnaavoq, ingerlatitseqqinneq nakkutilliinissamut pisariaqartuusorineqarpat.

§ 18. § 15 malillugu kommunalbestyrelse ingerlatsinerup tungaatigut nakkutilliinerminut atatillugu ilaqutariit paarsisartuni pissutsinik ernumanartunik maluginiagaqarpat, kommunalbestyrelsimut inissiisuusimasumut kommunalbestyrelse nalunaaruteqassaaq, meeraq pissutsinik ernumanartunik sunnerneqarsinnaappat.

§ 19. Kommunalbestyrelsip meeraq erngerluni peersissavaa, meeqqap atugarissaarneranut, peqqissusaanut imaluunniit ineriartorneranut annertuumik innarliisinnaasumik pasitsaassisoqarsimappat uku pissutigalugit:

- 1) meeqqamik amigartumik isumassuineq isumaginninnerluunniit,
- 2) timikkut tarnikkulluunniit persuttaaneq, paarsinerlunneq imaluunniit kinguaassiutitigut atonerluineq,
- 3) meeqqami imaluunniit meeqqap qanigisaani atonerluinermik ajornartorsiutit, pinerluttutut pissuseqarneq imaluunniit allatigut inuuniarnikkut annertuunik ajornartorsiuteqarneq, imaluunniit
- 4) meeqqap allatigut pissusilersornerani naleqqussarniarneraniluunniit ajornartorsiutit.

Imm. 2. Kommunalbestyrelsip imm. 1 malillugu meeqqamik paarsisunit peersitsinerminut atatillugu

nammineerluni isummerfigissavaa inoqutigiinni meeqqat allat arlaatigut iliuseqarfigineqassanersut, tassa meeqqat pineqartut ingerlaannartumik peersinneqassanersut imaluunniit ilaqutariinni paarsisartuni najugaqartinneqaannassanersut.

Imm. 3. Kommunalbestyrelsip ingerlatsinerup tungaatigut nakkutilliisuusup aamma utaqqiisaa kommunalbestyrelse inissiisuusooq sinnerlugu meeqqamik peersitsisup kommunalbestyrelse inissiisuusimasooq ingerlaannaq nalunaarfigissavaa. Matuma kingorna kommunalbestyrelse inissiisuusimasooq imm. 1 malillugu inaarutaasumik aalajangiisaaq.

§ 20. § 15 malillugu kommunalbestyrelsip pasitsaappagu ilaqutariit paarsisartut inoqutigiinniluunniit allat aanngajaarniutinik inerteqqutaasunik atuisuusut kommunalbestyrelse tuavioernerpaamik ingerlatsinerup tungaatigut nakkutilliiartussaaq.

§ 21. § 15 malillugu ingerlatsinerup tungaatigut nakkutilliinermut atatillugu kommunalbestyrelse aanngajaarniutinik inerteqqutaasunik atuisoqarneranik pasitsaassaqaruni inoqutigiinni ataaseq arlallilluunniit aanngajaarniutinik atuisuunersut paasiniarlugu misissorneqarnissaannik qinnuigisinnaavai.

Imm. 2. Imm. 1 malillugu aanngajaarniutinik atuisuunermik misissuisoqartinnagu, inuk aanngajaarniutinik atuisuunermut misissuiffigineqartussaq kommunalbestyrelsimit allaganngorlugu akuersisinnegassaaq. Akuersissuteqarneq pinngitsaaliissutaassanngilaq erseqqissuussallunilu.

Imm. 3. Imm. 2 malillugu inuup inoqutigiinniittup aanngajaarniutinik atuisuunermik misissorneqarnissani akuersaarumangippagu, § 23 malillugu kommunalbestyrelse nakkutilliinermik sakkortunerusumik ingerlatsisinnavaoq, imaluunniit Ilaqutariit paarsisartut pillugit Namminersorlutik Oqartussat nalunaarutaanni § 9 malillugu ilaqutariinnut paarsisartunut akuersissut atorunnaarsillugu.

Imm. 4. § 15 malillugu ingerlatsinerup tungaatigut nakkutilliinermut atatillugu imaluunniit allatigut pasitsaassisoqarpat, ilaqutariit paarsisartut ilaat imaluunniit inoqutigiinni alla aanngajaarniutinik inerteqqusaasunik atuisuusooq, kommunalbestyrelse ilaqutaannik paarsisartunik ingerlatsinerup tungaatigut nakkutilliisuusooq § 15 malillugu ingerlaannaq kommunalbestyrelsimut inissiisuusimasumut nalunaaruteqassaaq. Matuma kingorna § 10 malillugu kommunalbestyrelse inissiisuusimasooq pissutissaqanngitsumik kinguarsaanani inummut sammititamik nakkutilliinermik ingerlatsinissaminut pisussaaffeqarpoq.

§ 22. Kommunalbestyrelse ilaqutariit peqqissussaannik naliliinermiut atatillugu, Ilaqutariit paarsisartut pillugit Namminersorlutik Oqartussat nalunaarutaat § 5, imm. 2, nr. 10 malillugu, inoqutigiinni inuk ataaseq imaluunniit amerlanerusut qinnuigisinnaavai peqqissutsimut uppenarsaammik tunniusseqqullugit. Peqqissutsimut uppenarsaat qaammatit 3 sinnerlugit pisoqaassuseqassanngilaq.

Annertusisamik nakkutilliineq

§ 23. Kommunalbestyrelse annertusisamik nakkutilliisoqarnissaannik aalajangiisinnavaoq kommunalbestyrelsimit nalilerneqarpat, immikkut nassuiakkamik annertusisamik nakkutilliisoqarnissaa pisariaqartinneqartoq. Sivissusissaa pissutsit ataasiakkaat aalajangersimasut

suuneri tunngavigalugit aalajangersarneqartassaaq, taamaattorli nakkutilliineq ataaseq sivisunerpaamik qaammatinik 3-mik sivisussuseqartassaaq.

Imm. 2. Annertusisamik nakkutilliineq nalunaaqqaarluni nalunaaqqaaranilu ingerlanneqarsinnaavoq.

Imm. 3. Annertusisamik nakkutilliinissamut tunngaviusinnaapput:

- 1) nakkutilliinermiit nalunaarusiaq ataaseq inerniliippat ilaqutariit paarsisartut ajornartorsiutaat immikkut ittut nalinginnaasulluunniit misissoqqinneqarnissaat pisariaqartoq,
- 2) ilaqutariit paarsisartut pillugit naammagittaalliutigineqarpata,
- 3) kommunalbestyrelse nalinginnaasumik immikkulluunniit ittumik ilaqutariinni paarsisartuni pissutsinik ernumanarsinnaasunik meeqqamut paaqqutarineqartumut tunngatillugu imaluunniit meeqqamut pineqartumut eqquisunik maluginiagaqarpat, imaluunniit
- 4) ilaqutariinni paarsisartuni pissutsit piviusut paaqqutaqarnissamut akuersissut imaluunniit ilaqutariittut paaqqutaqarnissamut akuersissut malillugit ilaqutariittut paarsisuusinnaanermut piumasaaqaatinik naammassinninnissamut qularitsisut.

Imm. 4. Annertusisamik nakkutilliisoqarnissaanik taamaallaat aalajangiisoqarsinnaavoq pissutsit annertusisamik nakkutilliinissamik eqqarsaateqarnermut tunngaviusut pillugit ilaqutariit paarsisartut oqaloqatigineqareernerisigut. Pissutsilli immikkut ittut pisariaqartilerpasuk annertusisamik nakkutilliisoqarnissaa ingerlaannartumik aalajangerneqarsinnaavoq.

Imm. 5. Annertusisamik nakkutilliisoqarnissaanik taamaallaat aalajangiisoqarsinnaavoq ilaqutariit paarsisartut pissutsinik aalajangiinermut tunngaviusunik aaqqiisinaanerat aaqqeerusunnerallu ilimanaateqarsorineqarpat. Ilaqutariit paarsisartut pissutsinik ernumanartunik aaqqiisinaanerat aaqqeerusunnerallu naatsorsuutigineqanngippat ilaqutariinnut paarsisartunut akuersissutit atorunnaarsinneqarnissaa kommunalbestyrelsip aalajangissavaa, § 9 malillugu, Ilaqutariit paarsisartut pillugit Namminersorlutik Oqartussat nalunaarutaanni.

Imm. 6. Kommunalbestyrelse annertusisamik nakkutilliisoqarnissaanik aalajangiisimappat kommunalbestyrelsit inissiisuusut kommunalbestyrelsimiit ilisimatinneqassapput.

Nakkutilliinermiit nalunaarusiaq

§ 24. Kommunalbestyrelse §§ 15 aamma 23 malillugit ingerlatsinerup tungaatigut nakkutilliinerit tamaasa nakkutilliinermiit nalunaarusiamik suliaqartassaaq.

Imm. 2. Nakkutilliinermiit nalunaarusiami tulluittut ilisimasaat isumaallu kommunalbestyrelsimiit ilanngunneqartassapput:

- 1) ilaqutariit paarsisartut, tassunga ilanngullugit nammineq meeqqat angerlarsimaffimmi najugaqartut inuillu allat inoqutigiinnut ilaasut, aamma
- 2) meeraq paaqqutarineqartoq meeqqamullu paaqqutarineqartumut angajoqqaatut oqartussaasut.

Imm. 3. Nakkutilliinermiit nalunaarusiami paasissutissat tulluittut minnerpaamik saqqummiunneqassapput:

- 1) Ulloq nakkutilliiffiusoq.
- 2) Kina nakkutilliinermik ingerlatsisimava.
- 3) Nakkutilliartornissaq nalunaarutigeqqaarneqarsimanersoq imaluunniit nalunaarutigeqqaarneqarsimannginnersoq.
- 4) Nakkutilliinermut tunngaviusoq.

- 5) Kommunalbestyrelse nakkutilliiartortoqannginnerani paasisutissanik sunik piniarsimansoq.
- 6) Kommunalbestyrelse nakkutilliinerminut atatillugu kikkunnik oqaloqateqarsimansoq.
- 7) Ilaqutariit meeqqanik qassinik paaqutaqarnersut kiisalu meeqqat qassinik ukioqarnersut meeqqallu tapersorsorneqarnissamik pisariaqartitaat.
- 8) Nakkutilliinermit maluginiarneqartut suuneri.
- 9) Aanngajaarniutitik atuisuunermik misissuisoqarsimappat taakku ineneri, tak. § 21
- 10) Ilaqutariit paarsisartut ilaqutariittut paarsisartutut akuersissummi piumasaqaatinik malinninnerannik naliliineq.
- 11) Nakkutilliisoqarnerata, matumani aamma annertusisamik nakkutilliisoqarnissaanik aalajangiinerup, ilaqutariinnut paarisartunut akuersissummik atorunnaarsitsinissamik aalajangiinerup aamma paasisutissanik kommunalbestyrelsimut kommunalbestyrelsinulluunniit meeqqap ilaqutariinnut paarsisartunut inissinneqarnissaanik aalajangiisimasunut ingerlatitseqqissimanerup malitsigisaannik qisuariaataasimasut.

Imm. 4. Nakkutilliinermit nalunaarussiaq ilaqutariinnut paarsisartunut tusarniaassutigineqassaaq, tassani tusarniaanermut akissummik tunniussinissamut ullut 14-it piffissaritinneqarlutik. Naammassillugu nakkutilliinermit nalunaarusiap assilineqarnera ilaqutariinnut paarisartunut nassiunneqassaaq.

§ 25. Kommunalbestyrelsip § 24 malillugu nakkutilliinermit nalunaarusiamut ilanngullugit allassinnaavai:

- 1) paasisimasat ilisimatitsissutillu, aamma
- 2) pissutsit iluarsineqartariaqartut iliuuseqarfigineqartariaqartullu pillugit inassutigisat.

Imm. 2. Imm. 1 malillugu oqaaseqaatit imaluunniit inassutigisat ilaqutariit paarsisartut oqaloqatigineqareerneratigut suliarineqartassapput, aamma pissutsit oqaaseqaateqarnermut imaluunniit inassuteqarnermut tunngaviusut qanoq pitsaanerulersinnaanerannut imaluunniit aaqqiiffigineqarsinnaanerannut ilitsersuummik imaqaassallutik.

Kapitali 5

Meeqqanut ulloq unnuarlu paaqqinniffinnik ingerlatsinerup tungaatigut nakkutilliineq

§ 26. Nakkutilliinermit ingerlatsivik Meeqqat tapersorsorneqarnissaannut Inatsisartut inatsisaanni § 34, imm. 1 malillugu meeqqanut ulloq unnuarlu paaqqinniffinni, matumani aamma meeqqanut ulloq unnuarlu paaqqinniffiit immikkoortortaanni isumannaallisakkani ingerlatsineq nakkutigissavaa. Ulloq unnuarlu paaqqinniffiup pitsaassusissamik attassiinnarnissaa akuersissummilu piumasaqaatinik naammassinnittuujuarnissaa nakkutilliinerup qulakkiissavaa, kiisalu ulloq unnuarlu paaqqinniffiup Naalackersuisullu akornanni ingerlatsinissamut tunngatillugu isumaqatigiissutaasa naammassineqarnissaa qulakkiissallugu.

Imm. 2. Nakkutilliinermit ingerlatsivik ingerlatsinerup tungaatigut nakkutilliinermit atatillugu ulloq unnuarlu paaqqinniffimmi pissutsit misissorlugillu ulloq unnuarlu paaqqinniffimmi sulisunik oqaloqateqartassaaq.

Imm. 3. Nakkutilliinermit ingerlatsivik nakkutilliinermit suliasamik isumaginninnermini ulloq unnuarlu paaqqinniffimmut nalunaaqqaarluni nakkutilliiartortassaaq, paasisutissanillu ulloq unnuarlu

paaqqinniffimmit pissarsisassalluni.

Imm. 4. Nakkutilliinermik ingerlatsivik imm. 3 malillugu nalunaaqqaarluni nakkutilliartornerup saniatigut aamma nalunaaqqaarani ulloq unnuarlu paaqqinniffimmut nakkutilliartorsinnaavoq.

§ 27. § 26 malillugu ingerlatsinerup tungaatigut nakkutilliineq assigiimmik, aaqqissuussaasumik aamma uppersaaserluakkamik ulloq unnuarlu paaqqinniffiup tunniussasaanik inissatigullu atugassarititaanik, kiisalu ulloq unnuarlu paaqqinniffiup suliasamik isumaginnittarneranik nalilersuinissamut tunngavissiiisumik ingerlanneqassaaq.

Imm. 2. Nakkutilliineq ingerlanneqassaaq inunnit suliap, aaqqissuusaanerup aningaasaqarnerullu ataqatigiinnissaannik paasinnissinnaasunit taamalu ulloq unnuarlu paaqqinniffiup unammillernartoqartitaanik ingerlariaqqinnissamullu periarfissaanik nalunaaruteqarsinnaasunit.

Imm. 3. Nakkutilliinermut atatillugu Nakkutilliinermik ingerlatsiviup ulloq unnuarlu paaqqinniffimmi aqutsisut, sulisut meeqqallu inissinneqarsimasut oqaloqatigalugit peqataatittassavai. Nakkutilliinermut atatillugu meeqqanut angajoqqaatut oqartussaassuseqartut aamma ulloq unnuarlu paaqqinniffiup suleqatigisai oqaloqatigalugit peqataatinneqassapput.

Imm. 4. Nakkutilliinermut atatillugu siusinnerusukkut nakkutilliinermi nalunaarussiaasimasuni oqaaseqaatit, inassutigisimasat peqqussutillu aaqqissuussaasumik malitseqartinneqartarnissaat Nakkutilliinermik ingerlatsivimmit qulakkeerneqassaaq.

§ 28. § 26 malillugu ingerlatsinerup tungaatigut nakkutilliinerup makku imarissavai:

- 1) Meeqqat ilinniarnissamut sulinissamullu periarfissaat.
- 2) Meeqqat nammineersinnaalernissaminnut aamma ilaquuttaminnut attaveqaatiminnullu atassuteqarnissaannut periarfissaat.
- 3) Ulloq unnuarlu paaqqinniffiup sullinniagai, matumani ulloq unnuarlu paaqqinniffiup sullinniakkaminut neqeroorutigisaata imarisai kiisalu meeqqat inuunerminnut sunniuteqaqataanerat.
- 4) Ulloq unnuarlu paaqqinniffiup periaasii angusaalu, matumani perorsaanikkut, tarnip pissusaanik ilisimatusarnikkut imaluunniit ilaqutariinnik katsorsaanikkut suleriaatsit.
- 5) Ulloq unnuarlu paaqqinniffimmi aaqqissuussaaneq aqutsisullu.
- 6) Ulloq unnuarlu paaqqinniffimmi sulisoqarnikkut piginnaasat.
- 7) Ulloq unnuarlu paaqqinniffimmi aningaasaqarneq, matumani naatsorsuuteqarneris kukkunersiuisumit akuerineqarsimasumik kukkunersiorneqarsimasumik.
- 8) Ulloq unnuarlu paaqqinniffimmi inissatigut atugassarititat, matumani sullinniakkat pisariaqartitaannut aamma ulloq unnuarlu paaqqinniffiup periaasaanut naapertuunnersut.

Imm. 2. Sammineqartut tamarmik arlalitsigut naapertuuttunik tunngavilersorlugit itisilerneqassapput, ulloq unnuarlu paaqqinniffiup tamakkiisumik siumullu isigisumik aaqqissugaanik takutitsisumik.

§ 29. Nakkutilliinermik ingerlatsiviup misissussavaa ulloq unnuarlu paaqqinniffik ileqqoreqqusanik malinninersoq.

§ 30. § 26 malillugu ulloq unnuarlu paaqqinniffimmi Nakkutilliinermik ingerlatsivik nakkutilliinermik ingerlatsinerup tungaatigut nakkutilliinermi Nakkutilliinermik ingerlatsivik paasissutissanik pisariaqartitaminik qinnuiginnikkuni, ulloq unnuarlu paaqqinniffiup tunniutissavai.

Imm. 2. Ulloq unnuarlu paaqqinniffimmit paasissutissat Nakkutilliinermik ingerlatsivimmut tunniussaapput, ingerlatitseqqinneq angajoqqaatut oqartussaassuseqartoq akuersisinngikkaluarlugu pisinnaavoq, ingerlatitseqqinneq nakkutilliinissamut pisariaqartuusorineqarpat.

§ 31. Nakkutilliinermik ingerlatsivik ulloq unnuarlu paaqqinniffimmi pissutsinik ernumanartunik maluginiagaqarpat, Nakkutilliinermik ingerlatsivik Isumaginninnermut Aqutsisoqarfimmut aamma kommunalbestyrelsinit inissiisuusimasunut nalunaarfiginnittassaaq, meeraq imaluunniit meeqqat pissutsinik ernumanartunik sunnerneqarsinnaappata.

§ 32. Nakkutilliinermik ingerlatsivik kommunalbestyrelsimut inissiisuusimasumut ingerlaannaq nalunaaruteqassaaq, meeqqap atugarissaarneranut, peqqissusaanut imaluunniit ineriartorneranut annertuumik innarliisinnaasumik pasitsaassisoqarsimappat uku pissutigalugit:

- 1) meeqqamik amigartumik isumassuineq isumaginninnerluunniit,
- 2) timikkut tarnikkulluunniit persuttagaasarnera, paarinerlunneqarnera imaluunniit kinguaassiuutitigut atonerlunneqarsimanagera, imaluunniit
- 3) meeqqap atonerluinermik ajornartorsiutaanik, pinerluttarneranik imaluunniit allatigut pissusilersornikkut naleqqussarniarnikkulluunniit ajornartorsiutaanik naammaginangitsumik katsorsaaneq.

Imm. 2. Nakkutilliinermik ingerlatsiviup nakkutilliinermi allatigulluunniit paasiguniuk meeqqap inissitap imm. 1-imi pissutsit pineqartut naammagittaalliutigisimagai imaluunniit nalunaarutigisimagai Nakkutilliinermik ingerlatsiviup misissussavaa naammagittaalliut imaluunniit nalunaarut malitseqartinneqarsimanersoq.

Peqqusineq

§ 33. Nakkutilliinermik ingerlatsivik ulloq unnuarlu paaqqinniffimmut peqqussuteqarsinnaavoq. Peqqusinerup eqquutsinneqarnissaanut piffissaliussaq Nakkutilliinermik ingerlatsiviup aalajangersarsinnaavaa.

Imm. 2. Peqqussuteqarnissamik taamaallaat aalajangiisoqarsinnaavoq pissutsit peqqussuteqarnissamik eqqarsaateqarnermut tunngaviusut pillugit ulloq unnuarlu paaqqinniffimmi sulisut oqaloqatigineqarenerisigut. Pissutsilli immikkut ittut pisariaqartilerpasuk peqqussuteqarnissaq ingerlaannartumik aalajangerneqarsinnaavoq.

Imm. 3. Peqqussuteqarnissamik taamaallaat aalajangiisoqarsinnaavoq ulloq unnuarlu paaqqinniffiup pissutsinik aalajangiinnermut tunngaviusunik aaqqiisinaanerat aaqqeerusunnerallu ilimanaateqarsorineqarpat.

Imm. 4. Imm. 1 malillugu peqqussummik eqquutsitsinissaq akuersissummik peqaannarnissamut piunasaqaatinngortinneqarsinnaavoq.

Imm. 5. Ulloq unnuarlu paaqqinniffik imm. 1 malillugu peqqussummik eqquutsitsinnaanngippat ulloq unnuarlu paaqqinniffimmut akuersissutip atorunnaarsinneqarnissaa naalackersuisoqarfiup isumaginninnermut akisussaasuusup ulloq unnuarlu paaqqinniffinnik pilersitsineq ingerlatsinerlu pillugit Namminersorlutik Oqartussat nalunaarutaat malillugu aalajangersinnaavaa.

Imm. 6. Nakkutilliinermik ingerlatsivik peqqusippat, imm. 4 malillugu

piumasaqaatinngortinneqarsimasumik Nakkutilliinermik ingerlatsivik kommunalbestyrelsit inissiisuusut tamatumangga ilisimatinneqassapput.

Annertusisamik nakkutilliineq

§ 34. Nakkutilliinermik ingerlatsivik annertusisamik nakkutilliisoqarnissaanik aalajangiisinaavoq, Nakkutilliinermik ingerlatsivimmit nalilerneqarpat, immikkut nassuiakkamik annertusisamik nakkutilliinissaq pisariaqartinneqartoq. Sivisussusissaa pissutsit ataasiakkaat aalajangersimasut suuneri tunngavigalugit aalajangersarneqartassaaq, taamaattorli nakkutilliineq ataaseq sivisunerpaamik qaammatinik 3-mik sivisussuseqartassaaq.

Imm. 2. Annertusisamik nakkutilliineq nalunaaqqaarluni nalunaaqqaaranilu ingerlanneqarsinnaavoq.

Imm. 3. Annertusisamik nakkutilliinissamut tunngaviusinnaapput:

- 1) nakkutilliinermik nalunaarusiaq ataaseq inernilippat ulloq unnuarlu paaqqinniffiit ataasiakkaat ajornartorsiutaat immikkut ittut nalinginnaasulluunniit misissoqqinneqarnissaat pisariaqartoq,
- 2) ulloq unnuarlu paaqqinniffiup naammagittaalliutigineqarsimanera,
- 3) ulloq unnuarlu paaqqinniffimmi Nakkutilliinermik ingerlatsivimmit maluginiakkat nalinginnaasut imaluunniit immikkut ittut, imaluunniit
- 4) ataatsimut naliliineq malillugu ulloq unnuarlu paaqqinniffik pisariaqartinneqartumik pitsaassuseerussimasoq.

Imm. 4. Annertusisamik nakkutilliisoqarnissaanik taamaallaat aalajangiisoqarsinnaavoq pissutsit annertusisamik nakkutilliinissamik eqqarsateqarnermut tunngaviusut pillugit ulloq unnuarlu paaqqinniffimmi sulisut oqaloqatigineqareernerisigut. Pissutsilli immikkut ittut pisariaqartilerpassuk annertusisamik nakkutilliisoqarnissaa ingerlaannartumik aalajangerneqarsinnaavoq.

Imm. 5. Annertusisamik nakkutilliisoqarnissaanik taamaallaat aalajangiisoqarsinnaavoq ulloq unnuarlu paaqqinniffiup pissutsinik aalajangiinermut tunngaviusunik aaqqiisinaanera aaqqeerusunneralu ilimanaateqarsorineqarpat. Ulloq unnuarlu paaqqinniffiup pissutsinik ernumanartunik aaqqiisinaanera imaluunniit aaqqeerusunnera ilimagineqanngippat, ulloq unnuarlu paaqqinniffimmut akuersissutip atorunnaarsinneqarnissaa naalakkersuisoqarfiup isumaginninnermut akisussaasuusup Meeqqanut ulloq unnuarlu paaqqinniffinnik pilersitsineq ingerlatsinerlu pillugit Namminersorlutik Oqartussat nalunaarutaat malillugu aalajangersinnaavaa.

Imm. 6. Nakkutilliinermik ingerlatsivik annertusisamik nakkutilliisoqarnissaanik aalajangiippat, kommunalbestyrelsit inissiisuusut Nakkutilliinermik ingerlatsivimmit ilisimatinneqassapput.

Nakkutilliinermik nalunaarusiaq

§ 35. Nakkutilliinermik ingerlatsivik §§ 26 aamma 34 malillugit ulloq unnuarlu paaqqinniffimmi ingerlatsinerup tungaatigut nakkutilliinernit tamanit nalunaarusiortassaaq.

Imm. 2. Nakkutilliinermik nalunaarusiami paasissutissat tulluuttut minnerpaamik saqqummiunneqassapput:

- 1) Ulloq nakkutilliiffiusoq.
- 2) Kina nakkutilliinermik ingerlatsisimava.
- 3) Nakkutilliartorneq nalunaarutigeqqaarneqarsimanersoq imaluunniit

nalunaarutigeqqarneqarsimannnginnersoq.

4) Nalinginnaasumik imaluunniit annertusisamik nakkutilliineq pineqarnersoq.

5) Nakkutilliinermik ingerlatsiviup nakkutilliartortoqannginnerani paasissutissanik sunik piniarsimanersaq.

6) Nakkutilliinermik ingerlatsivik nakkutilliinermi atillugu kikkunnik oqaloqateqarsimanersaq.

7) Meeqqat qassit inissat eqqarsaatigalugit ulloq unnuarlu paaqqinniffimmi inissinneqarnissamut allatsissimanersut kiisalu meeqqat qassinik ukioqarnersut meeqqallu tapersorsorneqarnissamik pisariaqartitaat

8) Ukiumi kingullermi pissaanermik atuinerit qassiusimanersut.

9) Nakkutilliinermi maluginiarneqartut suuneri.

10) Ulloq unnuarlu paaqqinniffiup meeqqanik paaqqinniffimmiittuutiginartut nalunaarneqarsimasunik katsorsaannissamik isumassuinissamillu suliassaminik isumaginninnissamut piunasaqaatinik malinninneranik naliliineq.

11) Ulloq unnuarlu paaqqinniffimmut akuersissummi piunasaqaatit ulloq unnuarlu paaqqinniffimmit suli malinneqarnersut pillugu naliliineq.

12) Nakkutilliisoqarsimanerata kingunerisaanik akuersissummik atorunnaarsitsinissamik peqqusinerup aamma paasissutissanik kommunalbestyrelsimut kommunalbestyrelsinulluunniit inissiisimasunut ingerlatitseqqissimanerup malitsigisaannik qisuariaataasimasut, matumani annertusisamik nakkutilliisoqarnissaanik aalajangiineq.

§ 36. § 35 malillugu inaarutaasumik nakkutilliinermi nalunaarusiap suliarineqariarluni ulloq unnuarlu paaqqinniffimmut nassiunneqannginnerani nakkutilliinermi nalunaarusiap minnerpaamik ulluni 14-ini ulloq unnuarlu paaqqinniffimmut kiisalu oqartussaqaarfimmut ulloq unnuarlu paaqqinniffimik ingerlatsisumut tusarniaassutigineqassaaq.

Imm. 2 Nakkutilliinermi nalunaarusiap naamassillugu kingusinnerpaamik ullormi nakkutilliiffiusimasumit qaammatit 3-t qaangiunneranni suliarineqareersimassaaq.

Imm. 3. Nakkutilliinermi nalunaarusiap Isumaginninnermut Aqutsisoqarfimmut kiisalu kommunalbestyrelsinut meeqqanik ulloq unnuarlu paaqqinniffimmut inissiisimasunut ilisimatitsissutitut nassiunneqassaaq.

Imm. 4. Nakkutilliinermi nalunaarusiap Naalakkersuisut aamma ulloq unnuarlu paaqqinniffiup nittartagaanni avammut saqqummiunneqassaaq.

§ 37. Nakkutilliinermik ingerlatsiviup § 35 malillugu nakkutilliinermi nalunaarusiami allassinnaavaa:

1) paasisimasat ilisimatitsissutillu, imaluunniit

2) pissutsit iluarsineqartariaqartut qisuariarfigineqartariaqartullu pillugit inassutigisat.

Imm. 2. Imm. 1 malillugu oqaaseqaatit imaluunniit inassutigisat ulloq unnuarlu paaqqinniffiup oqaloqatigineqareerneratigut suliarineqartassapput, aamma pissutsit oqaaseqaateqarnermut imaluunniit inassuteqarnermut tunngaviusut qanoq pitsaanerulersinnaanerannut imaluunniit aaqqiiffigineqarsinnaanerannut ilitsersuummik imaqaassallutik.

§ 38. § 35 malillugu Nakkutilliinermik ingerlatsivik nakkutilliinermi nalunaarusiami ulloq unnuarlu paaqqinniffimmut inassutiginninnaavoq imaluunniit peqqusisinnaavoq pissutsit inassuteqarnermut

imaluunniit peqqussuteqarnermut tunngaviusut qanoq aaqqiivigissallugit naatsorsuutigisat allaganngorlugit pilersaarummik suliaqarfigissagai, matumani piffissamik killiliussisassaaq.

Kapitali 6

Naammagittaalliuteqarneq

§ 39. Kommunalbestyrelsip nalunaarut manna malillugu aalajangiineri Isumaginnittoqarfiup aqunneqarnera aaqqissugaaneralu pillugit Inatsisartut peqqussutaanni aalajangersakkat tunngavigalugit Isumaginninnermi Naammagittaalliuteqartarfimmut naammagittaalliutigineqarsinnaapput.

Imm. 2. Nalunaarut manna tunngavigalugu Nakkutilliinermik ingerlatsiviup aalajangiineri aqutsinermi oqartussaasunut allanut naammagittaalliutigineqarsinnaanngillat.

Imm. 3. Nalunaarut manna malillugu aalajangiinernut meeqqat suliat imminnut tunngassuteqartut pillugit naammagittaalliuteqarnissaminnut pisinnaatitaapput.

Kapitali 7

Atuutilerfia

§ 40. Nalunaarut ulloq 1. maj 2019 atuutilerpoq.

Imm. 2. Ilutigitillugu Isumaginninnermut tunngasunik nakkutilliineq pillugu Namminersornerullutik Oqartussat nalunaarutaat nr. 6, 16. februar 2006-imeersoq atorunnaarsinneqarpoq.

Namminersorlutik Oqartussat, ulloq 3. april 2019

Martha Abelsen

/

Julie Præst Wilche